

古蹟志

# 邕寧縣志卷四十三

垠西莫炳奎星五編纂

## 古蹟志

邕自晉置縣以來。至今千有餘載。山河無恙。城郭已非。其間宮室第宅。山亭水榭。與夫園林古剎。名勝風景之區。代遠年湮。無復存在。夫山邱華屋。遷變何常。俯仰古今。天地雖大。曾不能以一瞬。爾後之視今。安知不如今之視昔。故網羅放失。纂輯舊聞。姑無論狄武襄之歸仁鋪。王文成之講學臺。在所不遺。即前賢一名一物所留傳。必哀而錄之。俾後之君子。得所考覽。是亦載筆者之責也。志古蹟。



## 古蹟 不列目

晉興故城。

〔大清一統志〕在宣化縣南。

原作北。今訂正。

晉大興初置。隋改曰宣化。唐置邕州治此。

〔武終縣圖經〕晉晉興縣。今宣化武緣縣地。唐晉興縣始專在武緣。元和志。以唐晉興爲舊縣復置誤。

案晉興縣有二。晉之晉興縣。爲晉興郡治。故城卽今縣南古城。唐之晉興縣。武德五年。析宣化置屬邕州。宋開寶五年。改名樂昌縣。景祐三年。省入武緣。今爲武鳴縣。樂昌鄉。在邕寧縣北百里。一統志。以元和志有晉興南至邕州百里之文。不辨其爲晉縣唐縣。遂誤以故城在縣南者爲在縣北矣。

邕州故城。〔太平御覽引十道志〕邕州朗寧郡。晉置晉興郡於此。〔元和郡縣圖志〕唐乾封二

年。邕州置都督府。後爲夷獠所陷。

案事在高宗朝。見舊唐書李嶠傳。

移府於貴州。

今貴

景雲二年。以州界

平定。復於邕州置都督府。鬱江水經宣化縣南。去縣二十步。

案據此。則邕州故城。在鬱江北岸明甚。而寰宇記以爲在南岸誤

也。說見山川條。

〔柳河東集〕元和十三年。邕州有黑螭鼓江流壞北岸直城南門。

案據此亦見邕州故城之在鬱江北岸也。

〔明統志〕邕州故城。在南寧府城南二里。〔方輿紀要〕相傳唐時邕州治也。四方俱水而中高曰邕。有邕溪水經其下。咸通二年。邕州爲南詔所陷。後復治此。宋皇祐中。平儂智高

。改營今城。〔金通志〕宋皇祐中。始移江北。

案其誤與寰宇記同。江北當作城北。

濱江基地尙在。今名爲古

城。

〔蝸寄廬隨筆〕唐制。節度使治所。必於廳事前。建一崇樓。重簷疊拱。周施欄楯。下作圓門。通出入。旌節即度樓中。榜以軍額曰節樓。歷年久遠。惟湖北襄陽。廣西南寧之山南東道嶺南西道二樓僅存。並爲知府公

廊。他皆不復可見矣。志謂南寧府城。昔在邕江南岸。至宋皇祐。始移今所。茲以斯樓地點按之。殆不其然。案節樓卽譙樓。舊在南寧府署前。額題清風樓。今已改建法院。（宋知邕州祁陽陶弼邕州詩）南極諸蠻傲典刑。斗門時復見飛星。君王仁恕將軍老。五十溪州六萬兵。（又邕州城詩）夜半孤城百尺臺。亂蟲聲裏一尊開。憂邊日透南雲下。戀闕心隨北斗迴。（元禮部郎中臨海陳孚邕州詩）左江南下一千里。中有交州墮鳶水。右江西繞特磨來。鱷魚夜吼聲如雷。兩江合流抱邕管。莫冬氣候二春暖。家家榕樹青不凋。桃李亂開野花滿。蝮蛇掛屋晚風急。熱霧如湯濺衣濕。萬人塚上蚯蚓眼。三公亭下鮫人泣。驛吏煎茶茶葉濃。檳榔口吐猩血紅。颯然毛竅汗如雨。病骨似覺收奇功。平生所持一忠壯。荒嶠何殊玉堦上。明年歸泛兩江船。會酌清波洗炎瘴。（明國史院檢討福建永福王偁邕州詩）五管推名郡。雙江接上游。人家蠻霧曉。山雨瘴烟收。遠客誰青眼。殊方易白頭。今宵南極外。分野望牽牛。（明思恩軍民府祁門李汛邕州感懷詩）莫笑當年苦李吟。偏留此味到如今。五花洲外雙愁鬢。百粵天南萬里心。何必對人論曲直。自難與世共浮沈。紛紛從此遙相謝。歸去黃山不可尋。（明南京兵部尚書增城湛若水古邕州忽見故人翼謙之贈之歸湖南詩）人生如浮雲。散在天一涯。天涯又飄泊。浩蕩成離披。風吹一朝合。聚會豈有期。閒雲不出山。遊魚不越溪。行矣歸毋遲。春山多紫芝。（明總督惠安張岳入邕州詩）邕州城北兩江來。五管金湯亦壯哉。海賈盡通身毒布。瘞亭遙擬白龍堆。臥關虎豹春霾霧。入匣雌雄夜吼雷。御遠古來資上畧。天南璧馬已枚枚。（又發邕州往鎮南關詩）隔年梅雨記重遊。風雨依稀獠瘴收。老去筋骸慚歷馬。誰將華髮博蝸牛。孤月冉冉瀧頭月。雙槽迢迢天際舟。夜數星辰翻百念。非關鄉國起離憂。（明董傳策初抵朗寧詩）遊踪倦行役。轉盼無留奇。眷言適戍境。少憩案所宜。始至稍涉覽。愜然惻瘡痍。郊原曠人徒。委巷編荆離。聆音豈不然。將無疲繭絲。懸弧托遐想。鞅掌夙支離。感時迷觸理。服采繆陳規。銜戾屏人絨。荷芟涉天涯。征途不遑處。萍泛流風移。俄介甌駱氓。乍遜幽并兒。高旻盪炎微。落英斐幽姿。殊域匪思存。瞻景彌淒其。飄嵐散岳岫。啼鴉戾江湄。林靄變朝暮。物情良若斯。我戍靡歸聘。闐然銷襟期。飛篷目棲滯。通觀漫鬱伊。王成玄宰量。生全明辟慈。薄衷矢貞獻。義娥邈云馳。嚮道欣當汲。懷親悵方岐。明發秉斯心。寥寥賦居。 （順德拔貢生黎簡邕州詩） 屺屺荒城畫角哀。滔滔急水白沙頽。不勝今昔親垂老。如此風烟我再來。幾箇遊人非斷梗。是何名岳入邊垓。故鄉倘有浮雲月。可許幽輝滿鏡臺。（又送人客邕州詩）嶺南五月後。遞樓至小雪。君去五月涼。風舟坐高濶。峽江紅渾渾。山岐青潑潑。峯巒濃欲笑。似助人喜悅。回首知廣州。田肥膠泥沫。昔去憂老母。白首朝夕闕。今則慰倚門。屈指熟可割。行見西陲人。須復以義說。唇齒有扶助。韞糶無閉遏。使知堯舜民。本自同日月。地上月漸大。夜靜灘應沒。遙知火焰角。寸艸灘盛怒流奔。陡束黃江鐵峽門。氣相吞吐山川鬪。聲滿西南天地喧。一紙音書人共命。中年兄弟病勞魂。鄧林日色蒼蒼晚。急收桑榆報曉暉。

橫山廢縣。(大清一統志)在宣化縣東。(方輿紀要)在府東八十里。(唐書地理志)橫山。武

德五年析宣化置。案屬邕州乾元後省。(採訪)故址在今縣東五塘站墟。

武緣廢縣(唐書地理志)武緣。武德五年析宣化置。案屬邕州(元和郡縣圖志)武緣西至州也案邕州一

百里。鬱江水經縣南。去縣三十步。(太平寰宇記)在州東北六十里。案道里元和志為近有太武緣水

流入鬱江。案即今伶俐水(大清一統志)武緣廢縣。在宣化縣東。宋景祐中。移治樂昌。而故

城遂廢。(歷代地理韻篇今釋)唐武緣縣。今南寧府宣化縣東一百里(採訪)其址在今縣

東伶俐墟。案即鳥浪圩距城一百三十里。(武緣縣圖經)隋武緣廢縣。即梁嶺山郡。其地在今橫州西。唐武緣故

經武緣縣南三十步。若今武緣。不惟距鬱江遠甚。日居邕州之北。不在邕州之東也。考一統志。今武緣縣。乃舊樂昌縣。自宋移武緣於樂昌。為新武緣縣。而廢舊武緣。後之修方志者。不問其孰隋孰宋。多以嶺山為武緣別名矣。

封陵廢縣。(大清一統志)在宣化縣東。(元和郡縣圖志)西南至州也案邕州一百里。唐景雲

後置。案唐書地理志。輿地廣記。並作肅宗乾元間置。惟唐書楊思勳傳。開元十四年。邕州封陵縣。已有梁大海之亂。則縣富置於開元以前。元和志。作睿宗景雲間置最確。(太平寰宇記)廢

封陵縣。在州東一百里。可邏水出封陵大山。(元豐九域志)宋開寶五年。省封陵入武緣。

案此為唐武緣。即上武緣廢縣。(古今圖書集成)治平四年。撥武緣案宋太祖開寶五年。省封陵入武緣。仁宗景祐。移武緣治。今武鳴之樂昌舊縣。為新武緣。至仁宗治平三

年止。是時新武緣。實兼有唐武緣封陵及改名樂昌之晉興舊之上東案舊封陵地下南案舊武緣地一鄉入宣化。(採訪

縣三縣地。治平四年。復以舊武緣封陵二縣地。撥入宣化也。

今縣東封陵里張村。為其故址。距縣治百一里。

思龍廢縣(元和郡縣圖志)思龍東至州案邕州三百里。(唐書地理志)乾元後開山峒置。案屬邕州(宋

朝事實)開寶五年。省入宣化。(明統志)在府境思龍鄉(府志)嘉靖間案明史地理志始析宣

化思龍鄉。並西鄉。置隆安縣。隸南甯府。（大清一統志）故址在隆安縣南（採訪）今縣西

思龍鄉三四兩圖。爲其舊壤。

（明兩廣總督新建伯餘姚王守仁處置八寨斷藤峽以圖永安疏。）一添設流官縣治於思龍。照得南甯自宣化縣。至於田寧。逆流十日之程。宣化所屬。

如思龍十圖等處。相去尚有五日六日。其間錯以土夷村寨。地既隔越。而窮鄉小民。畏見官府。故其糧差。多在縣之宿奸老蠹。與之包圍。因而以一科十。小民不勝迫脅。往往逃入夷寨。十夷又從而侵暴之。地日凋殘。盜賊日起。近年以來。思龍之圖。鄉民屢次奏乞。添設縣治。以便糧差。蓋亦內迫於縣民之奸。外苦於土夷之暴。不得已而然。臣因入撫田甯。親歷其所。民之擁道控告者以千數。因停舟其地。爲之經理相度。得村名那久者。其地亦寬平深厚。江水縈迴環匝。旁有一江來會。亦正於此合流。沿江居民千餘家。竹樹森翳。烟火相接。且向武各州道路。皆經由其旁。亦爲四通之地。若於此分割宣化縣思龍一五六七八九十二。及西鄉之六八圖。共十里之地。而設立一縣治。則非獨以便窮鄉小民之糧差賦役。亦足以鎮據要害。消沮盜賊。其間小民村居。如那茄馬坳三顏那排之類。未可悉數。皆已淪入於夷。今若縣治一立。則此等村寨諸夷。自不得而隱占。皆將漸次歸復流官。而其地遂接比於田甯矣。夫南甯一府。所屬一州三縣。而宣化一縣。自有五十二里。今雖分割十里之地。以與田甯。而宣化尙有四十二里。一縣之地。猶四倍於一府也。況田甯又係新創流官。府治所統。皆土目巡檢。今得此一屬縣爲旁輔。又自不同。臣於前割上林以屬思恩之議。已略言之矣。且左江一帶。自蒼梧以達南寧。皆在流官腹裏之地。自南寧以達於田甯。自田甯以通於雲貴交趾。則皆夷村土寨。稍有疑傳。易成闕隔。今田甯思恩二府。即皆改設流官。與南寧鼎峙而立。而又得此新創一縣。以疎附交連於其間。平居無事。商貨流通。厚生利用。一旦或有境外之役。道路所經。皆流官衙門。庭中度兵。更無阻隔之患。此亦安民利國之事。勢所當爲者也。伏乞聖明裁允。仍定賜縣名。選官給印。地方幸甚。（兩廣提督巡撫莆田林富議上思田等處學宜疏）一添設流官縣治於思龍。臣等查勘得思龍地方。係是南甯府宣化縣屬鄉。但相去隔遠。往回動經旬日。以故官府之政令不行。入戶之糧差多負。而積年奸蠹。因得以夤緣上下。培植自肥。以致逃叛相尋。公私俱困。今若設立縣治。選置長吏。爲之承流宣化。以和輯民人。變化風俗。聯屬向武諸州。招徠那茄馬坳諸寨。民情土俗。最爲相應。但該鄉久屬南甯。一旦割歸田州。非但慕虛名而無實效。其實棄黔首以業左衽。况夷夏詳略異勢。好惡殊俗。目甲里甲異治。以中國之民。屬之土官衙門。未免陵轢蹂躪。額外剝削。生人之受害不足言。而地方之事。從此壞矣。故知府蔣山卿。以爲割肉補瘡。思龍之民何罪。彼蓋因所守信地。察知人情。不得不言也。臣等訪之故老。參之僚屬。僉謂思龍事情。必須建設縣治。欲設縣治。必於那久地方。蓋其地勢廣平深厚。江水縈迴。竹木森翳。道里四通。若縣治一立。真足以鎮據要害。消沮盜賊。但不以歸諸田州。而照舊屬之南甯。則遐荒小民。與官府日相親近。知朝廷所以軫念不遐遺之意。自然感恩從化。無復向者之魚散鼠匿。戶口日增。而藩屏日固矣。

如和廢縣。（元和郡縣志）邕州西南九十里。本漢合浦縣地。武德五年。析欽州南賓。今廣東靈山縣

安京今黃東欽縣二縣地置。因縣西南四十里如和山爲名。屬欽州。景雲二年。案唐書地志作景龍二年割屬邕

州（元豐九域志）景祐三年入宣化。（明統志）今名如和。都在新甯州東境。隆慶六年。自

宣化割屬。案明新甯州知州分宜張思中新甯州記云。如和鄉。原編四圖。析一二三三圖於新甯。而四圖一圖。仍在宣化。仍在新甯州志）故址在宣化縣蘇墟。

（採訪）今如和鄉四圖。案府志新甯州志。並作如禾。今從唐書及元和志作如和。又宋史作如化誤。

察院分司廢署（古今圖書集成）在府治南甯府也下同東北。正堂南向。穿堂後堂左右房。堂內外。各

有東廂房。儀門大門如制。今廢。

布政分司廢署。（又）在府治左。案其制與察院分司署同今廢。

南甯府同知廢署。（謝通志）在府署左。順治十八年。同知薛爾賓修。後移橫州平塘江。案以江口運館爲之。

南甯府通判推官署。（又）通判署。舊在府堂右。後改建於堂右理刑廳舊址。理刑廳。案即推官署

在府堂左。康熙六年缺裁。改爲通判署。

南甯府經歷司廢署。（府志）康熙三十九年裁通判。改其署爲經歷署。五十四年。又改爲府

倉。今以修和書院舊址爲之。（謝通志）在府署右。舊在府堂左。久圯。乾隆四十七年。

以司獄署改建。（採訪）宣統三年廢。

南甯府知事照磨諸署（府志）知事照磨檢校三署。在府署儀門外。缺裁後俱廢。陰陽學署



醫學署。在府署大門外左。慶阜庫在大堂右。申明旌善二亭。在府署大門外。久廢。

案明代。南甯府佐式各署。入前清。俱併入府署。

南甯府稅課司廢署。（府志）在安塞門外。缺裁。改爲龍母廟。今爲稅廠。仍供神像。

案稅廠。久廢。遞運所署。在城外。案今無攷。

府學教授廢署。（府志）與訓導署。並在學宮東。康熙三十八年。知府孫明忠建。（採訪）咸

豐後廢。

南甯府僧綱司。（古今圖書集成）在天寧寺。（採訪）今爲總商會。

南甯府道紀司。（又）在三清觀。（採訪）今爲第六國民學校。

南甯衛廢署。（明統志）在府治西。洪武二年設。（古今圖書集成）堂門各備。左爲經歷廳。

右爲知事廳前爲四所衙舍。堂外左爲左江道中軍廳。後改爲典史廳。右爲鎮撫司爲衛獄

。兵燹後俱圯。僅存此址。爲兵丁所佔。

思南城守廢署。（古今圖書集成）在府治內。

宣化縣舊署。（府志）先在古城舊墟。洪武二十年。徙附府治西南。案其址今無考嘉靖二十五年。兵

備陳哀。知府健。遷建於廢三清觀地。案即今縣署大軍倉左。縣庫在大堂西。

縣丞主簿廢署。（金通志）丞署在縣左。簿署在縣右。案今俱廢。

教輪訓導廢署。（謝通志）俱在縣學左。康熙三十七年。府同知馮壅。縣紳許必可。始建屋

於學宮左。（採訪）今廢。

典史廢署。（謝通志）舊在倉西門大街。（採訪）今變爲民居。

稅庫司署遞運所。 (府志) 俱在倉西門外。 案今無考

陰陽醫學諸署。 (古今圖書集成) 陰陽醫學僧會道會二司俱廢。 案今無考

建武驛丞廢署。 (方輿紀要) 在府治西南。 (府志) 在西門外。 (鄧氏譜) 鄧氏祠後瀕江。

(元)文學教授新喻傳若金書南甯驛詩。歲晚驅馳憶帝京。北京回首重關情。中天日月迴金闕。南極星辰繞玉衡。父老尚煩司馬檄。蠻夸須用伏波兵。也知文德能柔遠。傳道新恩欲罷征。(明)提學僉事上元謝少南南甯道中詩。華髮頻從鏡裏窺。青溪偏入櫂中思。邕州紫燕秋無社。蠻驛穠花冬有時。異域冠裳仍俗好。中原禮樂忝吾師。林間孔雀翩翩下。來就江濱照羽儀。

黃范驛丞廢署。 (府志) 在城南五十里。 (方輿紀要) 府南五十里。有黃范水驛。 (採訪) 今縣南莫村。

施泚驛丞廢署。 (方輿紀要) 府東六十里。有施泚馬驛。 (府志) 在城東北八十里。 原作六十里

(採訪) 即宋金城驛故址。在縣東五塘站墟。 (明)國子祭酒景陵魯鐸南甯道中與張時行司諫聯句。策馬南甯道。(魯)涼風起夕陽。路盤山脊險。(張)泉帶壑聲長。

巢鳥驚還定。(魯)湍魚隱復揚。軍容森候騎。(張)詩札富奚囊。客久知蠻語。(魯)村遙見野粧。肩夫花抹額。(張)欵長繡迴裳。樹鬢牛羊逕。(魯)巖開黍稷場。遠青新燒茁。(張)疎白老梅芳。行急常兼傳。(魯)眠安每憶航。素殮慚共爨。(張)清話愜連牀。歲逼寒猶靳。(魯)時侵意自強。理琴鳴鶴調。(張)倚劍發龍光。宵夢關王事。(魯)鄉心入壽觴。會教施泚吏。(張)傳檄過憑祥。(魯)又曉行宣化道中聯句。曉離施泚驛(張)隱隱發前旌。簿靄衿裾潤。(魯)初瞰騎從明。山椒風自暮。(張)樹杪露猶盈。蓐食狼兵過(魯)戎裝虎士迎。危橋經野水。(張)敗竈識荒營。飯葉墟入棄。(魯)衣花寨守榮。照昇雲晡駁。(張)原燎石支撐。健翮驚鵬擊。(魯)雄姿控驥征。行行日逾午。(張)望路兼程。一逕緣深竹。(魯)邕州見古城。(張)案明史張宏至。傳宏至字時行。華亭人。正德間。與魯鐸同使安南。

長山驛丞廢署。 (方輿紀要) 施泚驛。又東五十里。有長山馬驛。府東北四達之道也。 (府志) 在城東北一百三十五里。 (採訪) 故址在八塘長山墟。今為崑崙小學。

大灘驛丞廢署。(方輿紀要) 府西有大灘馬驛。(府志) 在城西七十里。(採訪) 故址在縣西金陵墟。

那龍驛丞廢署。(方輿紀要) 府西那龍寨旁有那龍水驛。(府志) 在城西一百二十里。(採訪) 故址在縣西那龍墟。

金城寨巡檢廢署。(謝通志) 在城東北八十里站墟。乾隆十八年重建。

八尺寨巡檢廢署。(又) 在城東南一百一十里劉村墟。乾隆十八年重建。(採訪) 後移駐蒲廟圩。

遷隆寨巡檢廢署。(又) 在城西南九十里蘇墟。乾隆十八年重建。

三官堡巡檢廢署。(府志) 在城南二百二十里那曉墟。(採訪) 明代三官堡土副巡檢。劉氏舊署。在縣南三官嶺。雍正七年革世職。改置巡檢署於那曉墟東南二里之大王山麓。後以低窪。改置那墟。咸豐後。移大唐圩。

潭落墟巡檢廢署。(謝通志) 舊在縣西一百二十里潭落墟。乾隆四十六年建。(採訪) 後移那龍墟。以上五巡檢署。自咸豐後。多借祠廟爲之。今俱廢。

那南寨巡檢廢署。(府志) 在城西一百二十里那龍墟。(採訪) 久廢無攷。  
南甯府署

左江鎮署。(古今圖書集成) 在縣學右。係民房。(謝通志) 在縣治左。府治後街。(採訪) 今爲督軍公署。

中營遊擊署。(府志) 在安塞門內橫街。案卽中府街守備署同。(採訪) 中營遊擊署。今爲造幣廠。  
中營守備署。今爲工程處。現改爲電報局。

左營都司署。（謝通志）在東門內大街。本遊擊署改。守備署在石牌坊大街。（採訪）左營都司署。署在昭忠祠。守備署今爲五冬雷氏祠。

右營都司署。（謝通志）在北門內。本遊擊署改。守備署在南門外下郭街。（採訪）右營都司署。今爲警察廳。守備署。今爲陸氏總祠。

城守營都司署。（謝通志）在南門內大街。案即馬草街本前營遊擊署改。（府志）守備署並城南門大

街。（採訪）城守都司署。今爲陸軍裝具廠。守備署。併入學院行館。

提督學政行署。（謝通志）在安塞門內。乾隆七年。知府蘇大俊於試舍增置石案石凳。（採訪）今爲財政廳。

演武廳大教場。（古今圖書集成）在城西北。謝通志作倉西門外外三里。大堂三間。本道張元芳額曰風

清嶺表。內掌三間。額曰退食自公。左右有府廳一間。縣廳衛廳各一間。今廢。（明總督

胤闕武詩）承平不講六韜文。教士春原盡日曛。營勢總然成虎豹。陣圖曾否象風雲。關門銷鑰孤城重。天地華夸一郡分。莫道南方能用武。斯民舊號伏波軍。

小演武場。（又）在城東北。有關帝廟一座。面前演武堂三屏。場牆一樹。明季兵燹圯廢。

（採訪）今日南教場。改爲民居。

茅亭。（府志）在縣北十五里馬退山上。唐元和中柳寬。爲邕州刺史。作茅亭於山之陽。從

弟宗元有記。今廢。

（邕州柳中丞作馬退山茅亭記）冬十月。作新亭於馬退山之陽。因高邱之阻以面勢。無薄

嶽然起於莽蒼之中。馳奔雲轟。巨數十里。尾蟠荒陬。首注大溪。諸山來朝。勢若星拱。蒼翠詭狀。綺縮繡錯。蓋天鍾秀於是。不限於遐裔也。然以壤接荒服。俗參夷微。周王之馬跡不至。謝公之屣齒不及。巖徑蕭條。登探者以爲歎。歲在辛卯。我仲兄以方牧之命。試於是邦。夫其德及故信孚。信孚故人和。人和故政多暇。由是嘗徘徊此山。以寄勝概。迺暨迺塗。作我攸宇。於是不崇朝而木工告成。每風止雨收。烟霞澄鮮。輒角巾鹿裘。率昆弟友生

。冠者五六人。步山椒而登焉。於是手攜絲桐。目送遠雲。西山爽氣。在我襟袖。以極萬類。攬不盈掌。夫美不自美。因人而彰。蘭亭也不遭右軍。則清湍修竹。蕪沒於空山矣。是亭也。僻介蠻嶺。佳境罕到。不書所作。使盛迹鬱湮。是貽林澗之媿。故志之。

迎春亭。（又）在城東二里。舊名春野。

（宋陶弼登邕州春野亭寄桂帥潘伯恭學士詩）二紀看花瘴霧中。野園今日又東風。人心有感時時別。春色無私處處同。長笛一聲諸曲靜

。巨觥雙飲百愁空。風清水暖羣魚上。誰向荆溪下釣筒。（明提學廬陵周孟中登春野亭詩）觀風五管已多年。每至南甯眼豁然。綠樹萬家依近郭。桑麻十里接平川。匙翻玉粒長腰米。膾切銀絲縮項鱸。景物於斯亦佳處。甲科何患少登賢。明嘉靖五年。知府蔣山卿重建。十五年。知府郭楠重修。更今名。歲爲迎春處。

三公亭（輿地紀勝在城北望仙坡上。宋皇祐間。狄青、余靖、孫沔、平儂賊。營於上。後

郡守陶弼。卽其地建亭。（方輿勝覽）陶弼詩。異日誰相繼。來書第四名。謂狄青余靖孫

沔三公也。

（陶弼三公亭落成飲其上詩）北原喬木外。三將舊屯營。草沒金鉞蹟。山應玉管聲。路隨關地起。江背瘴天傾。異日誰相繼。來書第四名。案一作三公臺。

（府志）後增祀蘇

緘、王守仁、莽吉圖。今則爲六公祠矣。

繡衣亭機宜廳。（金通志）在北湖宋安撫使顏敏德建。今廢。

心遠亭。（粵西文載）在兵備署中。

（明董傳策心遠亭記）凡好遊適林樹。與獲其幽勝境。大都曠逸之夫。而仕紳鮮邁焉。至其密邇治所者尤少。卽有之。或迫吏務鞅掌。聽斷籌判

。不少暇。閒就休沐。一過從。聊假宣洩湮鬱。要非其廓衷所真好也。嗟夫。爲理之貴適尙矣。託象遊神。翕張時措。靡不有圓機。然匪超敏軼塵之倫。其疇能辦諸。粵西巡臬治廡。其在管者殊僻隘。乃後僅圍數畦。逼市氓廢舍。表達衢巷。官私并屬。未穩。頃者臺石使君。屬邕守捐贏金。買其也爲闢荒徑。植卉竹。結亭其間。鬱然敞茂。氓所遺園。故有林木。使君且嚮意增濶之。於是泉廡之幽勝。殆亡異曠逸夫所遺遺矣。亭仍故圍而新者。以放一鶴。名孤鶴亭。環以幔林之邃。名留陰。使君業自爲記矣。其背衢巷之亭。巋然爽塏。名之曰心遠。蓋取陶淵明入境結廬心遠地偏之語。歲甲子竣工。屬余爲記。余惟使君高材敏識。庭無滯案。經略封環之隙。時時操觚染翰。坐亭中。攄幽暢之懷。權翕張之度。醒然神遊。滿腔春意。其所爲覆澤斯土者。匪專狗象假合云爾。命之心遠。良協化機。遠而靡忘。邇而罔泄。斯心應卽昭矣。獨亭乎哉。抑余追景往哲。而有慨乎中云。夫淵明業遂卷懷。遭時改

玉。雖已寄興冥沈。猶稱心遠。宛然戀主赤衷。世之高淵明。非其逸也。而或以避喧近達者謬矣。若使君出自掖垣。握符風紀。激揚攸寄。胞與鍾情。其所孳孳。思務規恢。仰宣王人德意。旁暢遐壤。又豈能匏繫口迹。徒自舒九。適志於幽勝間哉。以故略寰中詭奇。而稱述先民之心遠。厥指微矣。然則心遠名亭。惟使君輩為宜。即以標山澤之癯。悠悠忘世者不可也。

郭公去思亭。

（府志）在府東。明嘉靖壬戌。縣人為知府郭應騁建。

案今廢

青山亭館。

（又）在縣東。明嘉靖中御史董傳策被謫來邕。常遊於此。兵備徐浦。郡守方瑜

為築青山亭館。鑿石引泉。曰董泉亭。

（明方瑜青山亭館記）青山去城南十里。群峯翠律。截然於邕水之上。崖壑林塘。遠近映帶。前岡橫起。怪石錯列。如蹲

如伏。莫可名狀。石竅間泉。號號流出。峽勢旋轉。以扼江口。百川狂瀾。為之底定。毋說荒遠。足稱奇勝。歲在戊午。幼海董公。以正論忤時。被謫來邕。日與好事者杖履同遊。每至青山。輒徘徊終日。不能遽去。由是巡臬徐公。與郡之長吏。知董公之意。不擇地而安也。乃協謀相役。因山之坳。築亭一區。循石洞而上。海天曠濶。一覽無際。名曰洞虛亭。著所見也。橫蛇之下。構室四楹。白雲卷舒。時堪望遠。名曰白雲精舍。著所懷也。鑿石引泉。注之於池。鏘然有聲。可鑿可飲。池上之亭。名曰董泉。著所得而專也。游晏憩息之具。漸次告成。至是邦人之來遊者。目新所未見。耳新所未聞。莫不咨嗟歎慕。駭然於瞻望之餘。而董公則文陶然以樂。自信為青山之主矣。噫。當困抑之時。而抗思於烟霞之外。居荒遠之境。而寓跡於山水之間。自非超然卓識。浩然正氣。涉閱之深。學力之至。未足以及此。所謂素富貴。行乎富貴。素貧賤。行乎貧賤。素患難。行乎患難。素夷狄。行乎夷狄。於此有焉。若董公者可謂之賢也已。余孤踪遠行。斥守遠郡。既幸遇董公之賢。而又得與於山川登臨之美。有餘樂矣。作古詞三章。鑱之石壁。以寄吾不盡之懷。詞曰。山之椒兮石洞不扃。有亭翼如兮臨星辰。覽八荒兮何嶒嶸。天之高兮海之深。山之麓兮朝氣英英。茅堂隱約兮窈而冥。欲雨何時兮欲歸何心。吾亦同情兮白雲之村。山之泉兮汨汨其流。清氣灑然兮冷如秋。濯塵埃兮解煩愁。迴俗駕兮莫之與謀。（董傳策青山泉詩）泉水濯人纓。斯泉濯其志。濯纓去外塵。濯志安汝止。泉水洗人耳。斯泉洗其心。洗耳驅外響。洗心湛天真。有源委大廓。源清流不濁。本來非物染。無染亦無濯。（又響泉歌）有引。有仙客攜琴上青山。余因招致亭中。面泉而鼓之。厥聲冷然清也。聽之者飄飄有凌虛之想。爰為作響泉歌。歌不擇韻。隨口而成。春烟澹蕩江波平。山石扶搖亭子橫。有客攜琴山上行。招致方外同登瀛。坐來轉愛春景明。二儀懸光白日晴。原泉混混毓山靈。客將振羽遊滄溟。臨亭和絃戛以鏗。春風一曲響泉琴。聽之使我心神清。忽然萬木皆春聲。落花游絲如有情。林間好鳥相和鳴。遊魚出聽大樂成。高山流水傳遺音。覺時觸處道心生。堪作羲皇世上人。（又閏月重午郭華溪郡守招客同遊青山是日為余構亭詩）炎景載標

縣艾序。清游乍起築山盟。笙歌坐轉雲岳出。冠蓋行隨竹馬迎。亭敞石泉天外落。峯盤林洞日邊生。芳華喜沐棠陰在。漫指幽人懲赤城。（明左江兵備浦城徐浦咏董泉詩）石隙鳴泉瀉。秋深玉髓流。精靈涵太始。澄澈濬源頭。出澗節千頃。餘波沃九州。生民望龍雨。早晚此中求。（又董泉亭詩）青山上董泉亭。爲有高人築始成。直節漫誇羣嶽並。流風長其此泉清。慶纓濯處銷凡慮。杖屨看來谿吏情。好事盡饒君做去。登臨深媿逐虛名。

又建於山坳者曰洞虛。

（明韶州知府縣人陳大綸洞虛亭記缺）

橫蛇之下曰白雲精舍。皆有唱和詩序。

（明徐浦白雲精舍記）青秀

山。在邕郡東十里。山嶽然高。石磷然瑰而奇也。山之腰有甘泉。清冽可飲。山之麓則江水匯流。瀾漫浩渺。爲巨浸。山舊有寺。歲久頽圯。獨舍抱老松數十株。挺秀與此山並青。竊意青秀山之所以得名。或以此歟。是山雖未擅美載籍。然其龐且延袤。形勢甲於諸山。亦邕南一名勝也。上海幼海董先生。以忠諫謫居於邕。時常杖履此山。吟咏嘯眺。以發舒忠君愛國之情。邕之守。卽於泉之畔。爲亭。以爲先生憩息所矣。而亭之上。山勢峙聳。俯瞰羣山皆環列拜伏其下。先生思親望鄉之心。勃鬱於中。無以自寄。乃自築土一區。若臺然。少暇。輒登望白雲以寓思況。精神嚮往。恍若遙判親顏於數千里之外焉。噫。先生之懷苦矣。癸亥秋仲。徐子偕先生遊青山也。登斯臺。因憶吾邑有西陽嶺。昔人別友於其地。賦青山白雲之咏。至今傳誦。鑄石不朽。夫古人思友如此。而況先生忠君愛親之心。寄興是山。又與昔人之題咏者若合符節。乃捐資命工。築室三間。題曰白雲精舍。蓋取狄公望雲之義。以寓先生臣子之衷也。舍成。先生登青山。望白雲。其忠孝之心。固有以自寄。而後之人登斯山。拜斯舍者。其忠孝之心。不亦觀感而有興哉。維時同遊豹谷陳子在座。以精舍之築。不惟可以寄先生之懷。其有裨吾邕風教多矣。爰命書爲記。而繫之以詞曰。惟山有松。勁節凌空。惟山有泉。令名屬公。惟山有雲。瞻彼吳穹。有山有巖。仰止攸同。嗚呼先生之風。忠孝之衷。與止並崇。永山無窮。（又遊白雲精舍詩）與君登青山。凌風涉高臺。青山望渺然。白雲空悠哉。董君負道氣。持節遐方來。飢殮石上松。渴飲山中醅。恬然澄外慮。與物無恢諧。有詩發長嘯。清籟生八垓。素願祝昇平。君臣絕嫌猜。眷茲嚴慈恩。萬里隔雲垓。臨風懷獨劇。清夜腸欲摧。引睇何杳杳。崇巒接斗臺。因之寄遠眺。匪以咏物裁。斯臺寓觀戒。精舍山之隈。君暇時一登。晴雲天際開。浮雲暫點綴。太虛日弘恢。羨君撥雲手。望雲徘徊。僕幸侍公遊。興洽日暮催。驪駒不可攀。願言復追陪。千古雲間客。白雲臺崔巍。（董傳策青山構白雲精舍詩）誰結白雲窩。誰作青山主。秋生江上風。人向山中語。邦君有好懷。四牡肅至止。而我雅好遊。結廬聊得此。高岡抱平原。背峯面江渚。臨眺豁景光。良爲醒心處。前有混混泉。清若冰壺注。清泉注不舍。脉脉潤江樹。隔江羣峯。烟霞換晴雨。堪虞自無垠。山水互流峙。中有遊山人。觀水怡真趣。所貴適遊思。非必問我汝。明時天地寬。吾徒欣所遇。顧望白雲飛。何當賦歸去。（又遊白雲精舍四首）青秀山中青秀好。白雲臺上白雲遙。乾坤萬里東南坼。滄嶼三秋北望勞。自笑羈栖過狄轍。誰憐溼落類莊瓢。達觀好攬瀛寰勝。漫向風烟悵寂寥。○江疏林靄亂城隈。萬壘蒼然入望來。銅柱瘴生青海戍。銀潢秋斷白雲臺。思親望逐關河隔。報主恩從雨露

培。落落此山幾七載。壯心漂泊重徘徊。○幽懷兀兀<sub>原</sub>西<sub>原</sub>。精舍岩岩拱北辰。傲吏幾分青玉案。羈人空負白綸巾。天橫銀漢雲生岫。松落金甌石響津。清世游閒隨處過。休從殊域怨沈淪。○層臺縹緲鬱青葱。大廓浮生又此中。嶺外秋光還自好。天涯心事許誰同。峯尖晝鎖江皋雨。泉響宵分松塢風。遊子好遊偏繫縛。幾回虛聽客城鐘。  
(張佳胤遊白雲精舍懷董幼海年丈詩) 青山東峙大江圍。遷客遺居傍翠微。倒聽泉聲聒畔落。西來霞氣洞中飛。誅卯祇解談鳥致。折檻誰憐履禍機。前席牛還今不賤。遐荒儻記白雲扉。

孤鶴亭。(又)在兵備署中。明嘉靖初。王守仁征思田時。構亭演射。扁採射圃。後徐浦因

舊址增輯。更名孤鶴。

(明徐浦孤鶴亭記) 邕州分署之右。有隙地數畝。遂約三十丈。幅僅五丈。無名花異卉。臺樹林沼之奇。且居寢福。復賓客從遊之所不至。先時陽明先生。奉旨征田州。

駐師茲郡。構亭演射。扁曰射圃亭。嗣是來官者。去住不常。亭遂頽塌。即有久寓邕者。亦多羈縻案牘。無暇登憩。甚至有自蒞官初。至遷秩去。足跡未嘗入者。歲久蕪穢。鞠爲荒莽。嘉靖壬戌秋。予承乏來此。因舊址。葺垣檻。每公餘。箕踞坦腹。焚香掃几。獨哦其間。用澄俗慮。繼而有遺予孤鶴者。養翻茲亭。遂命名焉。良辰勝日。著履曳杖。逍遙亭中。惟見孤鶴飛鳴。飲啄。若解人意。撫而樂之。至忘昕夕。故雖吏事旁午。胸臆無奇。然草亭閒寂。素影踰躡。月夜則積水空明。鶴聲朗啾。無異山林間清致。豈非達人澄懷觀道之一助乎。主人坐亭觀鶴。對景舍毫。瞰幽引眺。其悠然塵外之趣。當有與鶴相忘者。杜少陵咏鶴一詩。其形容精矣。余奚容贅。爰記數語。以識命亭之意云。

留陰亭。(古今圖書集成)在兵備署中。亦徐浦建。

一鑑亭。

(又)在府治內。明知府梁炫建。案時爲萬歷三十六年

接官亭。(金通志)在城東北四十里。久廢。今築茅亭於舊址。

張公去思亭。在城北望仙坡下。光緒間。縣人爲邑令張秉銓建。今改爲兵舍。

西亭。在新西門外。

崑崙臺。(大清一統志)在縣東北崑崙山上。

(宋陶弼邕州崑崙臺詩) 落照古城隅。邊風動隼旗。久聞忘戰略。多病熟醫書。老髮隨年短。新情與世疏。桃花春水暖。



誰釣舊溪魚。(又早登崑崙臺望戍兵北歸詩)春風歸未得。默坐廢臺間。居易衷腸結。安仁兩鬢斑。蜂銜新蕊去。燕引舊雛還。帳下誰更戍。旌旗出亂山。

月臺。(又)在府治宅堂後。舊曰忠節堂。宋安撫顏敏德建。

南城臺。(又)在府城南隅。

(宋陶弼南城臺詩)江國家書少。秋臺閑草生。無人來遠渡。盡日上高城。落照懸魚市。孤烟起戍營。東籬改園菊。又向酒中生。

清風臺(金通志)在府治東。宋安撫任忠。建爲避暑之所。(建通志)久廢。明築清風館。

(明宣化知縣候官王大經清風館記)邕於粵爲雄郡。居上游。而風氣文物之盛。儼跡中州。然地瘠民獷。語言譯鞮。遠府城白里。卽逋負山谷。似非聲教所及。我暉山方翁。膺簡命來守是邦。迺先之以教化。講明正學大義。刻一齋日紀等編。以作率興士。故民翕然嚮風。逾月而邕大治。蓋翁以直道屢屈於時。既轉南曹。則資望日深。計擢應貳藩臬。乃拜邕守。時論咸憮惜。而翁則欣然就道也。泊抵邕。每圖思焦勞。救弊補偏。興革庶務。或至不遑啓處。一夕方退食。乘休暇。命童子伐豎塗。除荒穢。乃於郡署之北。得隙地閒曠。廣不盈畝。而聳然突兀。高阜平邱。龜蹲蜿蜒。俾藝治之。芟夷之。始見其中石。土埤。頽然半蝕。蝸跡苔封。薊菴菴。雜於荆莽之中。亦不知其歲月幾何矣。既疇咨故老。相傳以爲宋人所築清風臺舊址。然不可考矣。翁嗟悼良久。遂劃然喜曰。清風吾故人也。吾官於斯。舍於斯。則清風與吾當爲主賓而臺之興復。舍吾將奚適。乃命工劂竹木。治陶冶。構以成室。翁自扁之曰清風館。夫臺則人所休沐之地。其爲義廣博。清風主人。恐不得而專之。謂之館。則旦夕與聚。瞬息動靜。咸於是乎游衍。是清風固可居然得也。夫清風不能自爲賓。得翁之退食從容。而飄然徐來。則見其愜情和衷。解慍阜財。豁然於物表。以詠以觴。優游成趣。將不知其天地吾身之孰爲大小。而何有於物我形骸。行藏失得之橫擾於胸中。蓋披吾之襟。卽與之俱忘矣。翁爲主於內。清風和鬯於外。是以寵辱弗驚。循性而行。隨遇各適。今日守邕之遐荒絕域。不帝若中州南國之安。而紆金服緋。師帥一面。可當諸侯之貴。而翁則視若固有焉也。夫翁之德盛。自然罔所俟養。然豁達容物。充裕不校。使人人可親。粹然有道氣象。其獲益於清風。不旣多乎。夫風在易爲巽。巽之德入。故風能悅萬物。然則斯館也。其廉頑立懦之澤。又當在百世之下。而使人興起。旣落成。翁命卽墨卿呼余進之曰。吾與清風爲主賓。然介紹而傳者非子歟。其爲我颺言之。以代儻相之義。余謝不敏。敢請於賓。復於主人。皆曰諾。然後書之。(武緣教諭閩縣鄭豫夫南甯清風館詩)宋家任安撫。夏月納新涼。清風來臺榭。綺琴詠虞唐。逸興歇千載。蜚飛留一方。謇余朗甯寺。詞藻金石鏘。築館仍古迹。浴德烟天光。擊筑卑漢辟。披襟陋楚襄。白日展鄴卷。素絲紹牛羊。噫氣生松壑。輕颺滿銀牀。飛花疑鳳舞。拂竹似龍驤。北窗臥靖節。太上齊羲皇。舉扇障規塵。還珠見孟嘗。有懷播南薰。轉令被八荒。兆民翕偃草。庶尹歌甘棠。賢侯正風化。薦剡騰廟廊。么麼文學吏。

謬識天孫章。慚匪宋玉賦。幾度結詩囊。

講學臺 在敷文書院。爲王文成公講學處。今毀。

最高臺 (府志) 在城西。地勢突兀。俯視一城。

案府志徐浦最高臺記。謝通志。俱有最高臺爲梯雲閣舊址之文。誤甚。今概從刪削。而梯雲閣自爲一條。明

同知張貫建。

案建字上有改字。下有更名二字。今刪。

兵備徐浦增修。有記。

(採訪) 光緒間。提督龍濟光。改爲

樓。扁曰武備。

(明徐浦最高臺記) 南甯郡城之西。有上一區。聳然特起如阜。下視塵塵闐闐。若蟻蛭。父老傳聞。咸謂梯雲閣舊址。然不可考。但其地勢突兀超拔。巍然孤峙。非惟快遊之士。洞心駭目之

觀。卽有警。便瞭望焉。亦一郡雄勝也。先是郡貳守張公貫。構臺其上。草率未備。予巡邕之明年。爲之增垣牖。闢前隙地。稍廣其制。視昔頗稱美矣。每良辰。延賓登賞。因得以縱觀其勝槩。但有晴空霽日。孤嶼遠橫。斷嶂連巒。諸峯拱揖。至於青羅二山之勝。亦皆環列拜伏其下。如几如席。而臺之前後。復有佳木繁陰。翠篠敷郁。俯睇城之居民。負者休。行者歌。老者扶。壯者矯。商賈市肆。嬉嬉焉咸得其所。登之者未有不心曠神怡。精爽飛越。若挾翅於千仞之上焉。夫粵西諸郡。惟邕城爲高。而青羅二山。又郡之擅名者。而是臺乃獨超然於二山之上。特出於一城之表焉。命之曰最高臺。名斯稱矣。然竊惟自古羈遊之士。寄跡寓土。必有名勝之地。以疏暢其情性。若陳公之凌虛。庾老之南樓。雖其興致不同。而憑高理詠。托物懷懷無二也。况斯臺有裨封守。又不獨遊觀之具而已乎。僉謂不可無記。遂書之。以屬守邕者。(明南甯府同知蘄水張貫最高臺同幼海諸公詩) 建武崇臺舊猷蠻。臺荒今羨此臺攀。星河東注盤邕水。雲檄南憑指號山。五嶺瘴消樽俎際。四雄寇靖鼓鼙間。如流筆翰還賓從。信有名公日日閒。(明南甯府知府欽縣方瑜最高臺同幼海諸公詩) 城上層臺控百蠻。清秋樽俎得相攀。兩江形勢疑無地。何處登臨別有山。銅柱影含烟霧裏。崑崙功奏笑談間。丈夫意氣高如許。暢飲何妨半日閒。(明董傳策九日同何子登最高臺詩) 重陽又上最高臺。游子他鄉幾度來。萬里未逢秋菊放。一尊聊對五雲開。青峯陣裏孤亭矗。白鷺洲前二水迴。漫倚西風懷百感。故人今日暫追陪。(明松潘兵備縣人陳瑾九日最高臺散集詩) 側帽倚丹梯。龍山興可齊。憂時唯泛蟻。憫世畏燃犀。俯視千峯小。平臨萬竹低。昔賢拖屐地。花徑自成蹊。(又中秋前四日集最高臺分賦二首) 修郭連青竹。方樽醉綠羅。雨奇翻憾少。月近只宜多。宴曾難爲集。秋宵易鄭過。江城休下漏。猶未了詩魔。高處晃茆屋。到來無一人。前汀誰理楫。薄暮尙垂綸。添景歸圖畫。宜樓壓水濱。頽然看我輩。格韻也清新。

籌邊樓。

(府志) 在城上西北隅。

案明統志。作在府治子城上。

舊爲荷恩堂。宋安撫任忠易今名。

(明陳瑾登最高臺籌邊樓

轟雲樓。（輿地紀勝）在府城西北隅。（府志）久圯。崇禎元年。兵備張元芳重建。又廢。

詩）木葉臨波欲變秋。不堪惆悵獨登樓。江迴漲跡遷砂嘴。雲約峰尖點石頭。野老醉吟惟岸幘。將軍閒暇目輕裘。嶠南薊北艱難日。誰放頽顏得破愁。案據陳瑾詩。則籌邊樓實在最高臺上。故連綴於此。

平楚樓。（輿地紀勝）在城東隅。（採訪）在府治左。題額四。東曰宣和。南曰通明。西曰應

候。北曰拱辰。明嘉靖十年。南甯衛指揮王佐。鑄銅鐘置其上。今名鐘鼓樓。

高明樓。（古今圖書集成）在府治清風館後。嘉靖十四年。知府方瑜建。

奎星樓。（又）在學宮前。

梯雲閣。（輿地紀勝）在府治子城東北隅。踰街而過五花洲。案橫州有淮海堂。為秦觀建。邕案當在慶祝宮後城上。即今測量局。後舊有烟花門。通脂麻巷。所云踰街本此。

淮海堂。（古今圖書集成）在府治內。舊安民坊。案橫州有淮海堂。為秦觀建。邕亦有之。殆少游遊跡所及耶。

安政堂。（一統志）在城東。宋顏敏德建。

雲錦堂。（金通志）在府城上。宋顏敏德建。案府志。一統志作雲錦亭。

雙梅堂。（一統志）在府治。舊有梅二株。枝生連理。

瑞文堂。（又）在府治清風堂後。以堂前有池。生並頭蓮。故名。

忠愛堂。（古今圖書集成）在府治雙梅瑞文兩堂之前。明正統八年。知府汪瓚建。

景榕堂。（又）在巡道署內。明崇禎五年。兵備黃中色建。今存。案久廢

內省堂。（府志）在府署左。乾隆六年。知府蘇士俊建。

雙峯草堂達礫山莊。（黎二樵五百四峯堂詩鈔）在縣南達莊村。為詩人黎簡讀書處。

（清拔貢順德黎簡憶母舅山莊詩）（自注。十六歲讀書於此。別二十年矣）。虎豹輪困黑石叢。蘭泉兩脯腋飛虹。午移山鬼開銅鏡。夜禦熊人響鐵弓。雨外簷晴千嶂日。吟邊衣卷八方風。廿年矮屋滄江岸。已似舟居作釣翁。（又寄雷氏表兄山莊詩）南嶽名山莊。（自注。達桑方言大石也。兩山之間。大石橫截。中有流水。故名。）石泉灑古翠。行人俯雲岷。千丈不到地。雲水兩衝撞。爭上爲雨氣。盤盤赴山居。樓閣冠形勢。叢篁攢如峯。陰籬下爲蓋。松枝直于石。石乃復怒避。諸奇競成易。衆響互相礙。孤亭斂暇物。甯心休變態。昔此依母舅。杖几孰陪侍。勝懷已飛騰。始有十六歲。代竹兩峯抗。名當八分字。（自注。予時爲雙峯草堂於屋後。）屋後一徑直。天末萬象至。城中十餘夫。百里致書笥。悵矣書被災。山翁亦仙逝。藥山松排風。年深作哀吹。（自注。母舅葬樂山之麓）茲堂不十稔。楹檻就蕪廢。而翁所登頓。烟霄坐談藝。葺補不以我。庶續往者志。白鹿定有子。老鶴未損翅。魂夢十七載。宿宿入往事。山川數千里。夢遠恐失墜。倘來萬山樓。經過我亡妹。孤墳山路傍。爲我一吊祭。我甥爾族子。無使坐顛沛。我今坐拘束。今昔有難易。死爲不及訣。生爲遠拋置。嗚呼我陷缺。終身負情義。或能復重來。堂下理荒穢。亦爲修其墳。畚泥雜洏涕。（又寄邕州雷氏表兄山莊詩）麋鹿雙峯堂。來仍幾葉孫。破月無近路。廿年成遠親。江湖計水驛。風月夢山村。歲時自一家。樓臺空四鄰。山鬼語夜雨。峒奴春曉雲。石鮫穴地響。崖峯過壁聞。吟燈明竹館。琴月映蘿門。疇昔數晨夕。詩書誠弟昆。一襖采芹衿。遂嗾佩蘭人。青雲誤西笑。烏几動南轅。待士開東華。窮途迴北塵。荊釵老姑母。松閣古徵君。（自注。素峯母舅）大雷寄書崖。華陽挂壁巾。歿存兄妹濶。山川草露春。朝哭雲嶂日。暮別桂叢昏。休文三載病。應無可瘦身。

### 知愚齋。（粵西文載）在府治內。

（明侍講學士福建古田張以甯知愚齋記）真定張君士進。來長邕幕之半載。府以治稱。予使安南。道是郡。君來見。以其講學之齋居名知愚者。請子記之。

。子曰噫。子豈患者哉。古者以愚稱者。柴之愚。質之偏也。甯之愚。智自全也。顏之愚。幾乎聖之賢也。是三者非真愚也。語曰。今之愚也詐。中庸曰。愚而好自用。被惟不知其爲愚也。故欺於人而爲詐。狹於己而自用。斯其爲真愚也。苟知愚焉。斯不愚矣。大抵世之仕者。每病於用智而自私。好名而已甚。是故察見淵魚。古人所忌。黑白太明。識者憂之。聰明絕人。守之以愚。斯君子之道也。今子之贊畫於茲也。舉十九年流離殘苦之遺氓。飲饑而煨寒之。數千里魍結文身之獷俗。皆馴擾而帖伏。百萬兵需咄嗟立辦。此非達而果於從政者不能也。子其果愚乎。其不愚乎。今子自名以知愚。子何以處子。識時而通務。非柴之愚也。逢時而響用。非甯之愚也。非徒知之。亦允蹈之。仕優而學。子其志顏子之如愚乎。語云。用之則行。實而若虛。子非顏焉攸學乎。諺有護子許人之已汰者。則語之曰儒先不云乎。顏何人哉。希之則是。君謝曰。敢不勉諸。遂書以爲記。

### 易安軒。（古今圖書集成）在府衙後。嘉靖四十二年。知府方瑜築。

（方瑜易安軒記）南甯粵之粵區也。粵界南荒列郡。風土與中

州迥異。故自昔宦遊者。多不樂來此戍。四月。余以戶部郎。出守是郡。知交爲余歎息。謂非所宜。雖余亦未遂釋然也。比至而矚其疆域。譏其風俗。則四山環合。去城郭稍遠。川原曠朗。而瘴癘非所憂。適歲初登。防禦有備。盜賊蛇虺之害。屏息而遠。且僻處一隅。使賓客旅所不至。無往來送迎之勞。其風俗迥然。又與別郡異。而余心始安焉。已而臨民視事。尋往牘。索民隱。於其利病之所在。宜者輒行。太急者罷。蓋未三月。郡民翕然。幸新守之不擾也。亦皆安於市野。不震不貳。以服習其政教。噫。豈荒遠龐樸之郡。爲之守者。非必高明才智。雖迂拙如余者。亦足以任之而無疾於民歟。然莫之知也。余於是則又思安不可懷也。一郡之事。百責攸萃。雖朝勞勤。靡違啓處。猶有壅滯闕失。孰能以燕安處之。況余之來也。去家與國。殆將萬里。瞻天望雲。展轉於懷。憂讒畏譏。殆不可以終日。而欲疆以爲安。夫豈其然乎。乃若奉天子明命。綏柔斯土。使遠近之間。安於無事。又以親之遺體。優游假息。得免於勞瘁疾苦之患。而怡然以自得。若是。則雖謂之安可也。郡治之後。有屋四楹。爲燕息之所。狹小僅可容膝。乃題之曰。易安。以見余之安斯土。以斯民之所以安於余者。皆從其易。而無過望之意也。是爲說以記之。案圖書集成。南甯府藝文。作陳大綸記非。今改正。

聚星館 (又) 在府治左。明同知張貫建。(府志) 後改寅賓館。

玄風圃。(府志) 明宗室雪窗別墅。許應元、謝少南、並有詩。(許應元同岑蒲谷憲使。徐吾溪兵備

谷。斷有高唱。各次原韻二首)。巖亭攀歷晚。秋色滿高林。竹密雖陽苑。畦成漢水陰。每看題石處。彌觸住山心。未遂辭纓冕。他年愧盃簪。名園纔近郭。已覺遠塵囂。石露下松葉。溪雲生藥苗。亭臺延夕眺。劍履遲春朝。時聽村叻語。欣逢布六條。(明謝少南魏此齋大參招遊玄風圃詩) 豪士知予物外情。炎天招引碧山行。亭心風裊青蘿遠。水面雲飄白苧輕。古洞恍如曾寓舍。靈仙前訂隔山盟。懸崖漫掃縣名石。芝草琅玕好自生。(王宗沐游玄風圃見梅花詩) 名園久惜賞心違。忽漫梅花已半飛。時序暗傳天外信。物華頻換客中衣。雪簌疎影臨丹洞。月伴香魂引素妃。寄語東風吹莫盡。爲留孤萼占春暉。

歸仁舖。(金通志) 在縣北三十里。宋皇祐中狄青討儂智高。陣於歸仁舖。大敗之。

大宋平蠻碑。(又) 安撫使余靖撰。(謝通志) 宣化大宋平蠻碑待訪。(余靖大宋平蠻碑記並頌) 聖宋體天法道。欽文聰武聖神孝德

皇帝。在宥三十一年。天宇之內。海渚之外。毳裘卉服。罔不率俾。越五月。蠻賊儂智高寇邕州。陷其郭。賊虐衣冠。驅虜稚艾。遂沿鬱江東下。所過郡縣。素無壁壘。猝然寇至。吏民棄走。因得焚蕩剽鈔。無所畏懼。乃攻圍廣州。

五十餘日不克。大掠其民而去。然所存者官舍倉庫而已。百年生聚。異域珍玩。掃地無遺矣。國家於嶺南。不宿重兵。故賊起三月。而後師集。蔣偕、張忠、素號驍將。相繼覆沒。由是畏懦者望風潰走。賊烽益熾。逼連賀。毀昭賓。再穴於邕矣。驛音繼聞。上甚憂之。樞密副使狄公青。以爲將帥之任。古難其才。若再命偏裨。事一不集。則二廣之地。禍連而不解矣。亟目請行。天子聽之。遂改宣徽南院兼荆湖南北路宣撫使都大提舉廣南東西路經制盜賊事。九月拜命。既受禁旅。仍啓以舊鎮騎兵。及荆湖銳卒從行。十二月。至桂林。督部伍。親金鼓。然後兵知節制矣。明年正月甲辰。至賓州。先是鈐轄陳曙。領步兵八千。潰於崑崙關。公推其罪首斬曙。及佐吏以下三十一人。然後人知賞罰矣。兵將股慄。咸思用命。是月己未。引師至邕城一舍。賊悉其徒以逆戰。公之行師。雖倉卒道途。皆有行例。賊至駐先鋒以接之。公憑高望。搗騎兵以翼焉。賊徒大敗。追奔十五里。斬首三千二百餘級。生擒五百人。尸甲如山。積於道路。僞署將相死者五十七人。是夕智高焚營自遁。復入於蠻中。先是命湖廣江西路安撫使樞密直學士孫沔。人內押班石全彬。過嶺。與廣西經略使余靖。同經制東西賊盜。故命公都大提舉。然孫石贊謀。而軍中悉稟公之節制。賊之再據邕也。農者輟耕。商者輟行。遠邇惶惶。不聊其生。及公之拜命也。朝野之論。中外僉然。以方召之才。兼機軸之重。出剪狂蠻。無唯類矣。賊之巢曰廣源州。交趾之附庸也。父爲交趾所戮。遂棄其州。奔南蠻界中。悖傲以僭稱號。自名其居曰雲南道。又曰南天國。再名其年曰景瑞。曰啓歷。雜名其左右之人。自侍中開府以下署之。其主謀黃師宓。儂建侯。儂智忠等。戰沒於陣。未有剪其羽翼而能飛。剗其心腹而能全者也。故宵遁矣。嗚呼。智高之謀。十餘年間。招納亡叛。共圖舉事。十餘月間。連破十二郡。所向無前。夫豈目知破碎。奔走於頃刻之間。乃知名將攻取。真自有體哉。二月甲戌。乃改乘轅。其月丁亥至桂州。詔徒護國置節度。復以樞密使召仍曲赦。嶺南民得休息矣。遂磨桂林崖石。以書其勳。辭曰。有宋之大。天覆地載。四海正朔。百蠻冠帶。蠢茲狂寇。起乎徼外。父戮於交。逃死獠界。招納亡命。浸淫邊害。邊臣罔上。失職以懈。猝臨邕郭。乘流東邁。志圖全越。肆其蜂蠆。廣城言言。梯衝附焉。攻之五旬。掠民而旋。賊鋒一至。千里無烟。還據於邕。五嶺騷然。天生狄公。輔聖惟忠。情存義烈。志疾頑兇。請纓卽路。仗節臨戎。英才遶集。猛將風從。賊之敢鬪。實惟天誘。來迓於郊。奄喪群醜。當我摧鋒。易如拉朽。僭補僞署。叢然授首。羽翼既剪。心腹既剗。雖欲再舉。人誰與圖。焚廬而去。回巢以遁。六親不保。曰獻其俘。厥惟邕邊。南國之紀。九峒襟帶。列城唇齒。險固一失。兵糧無時。庶民蚩蚩。鳥驚獸蹙。我公之來。電掃雲開。叛蠻卒破。綱領重恢。師成廟算。民得春臺。天聲遠振。繫公之才。今從余襄公武。案碑有二。在縣者已佚。在桂林城北鎮南峯者尙存。篆額徑九寸。碑文真書徑二寸。撰書人名氏剝落不可辯。溪集錄入。

綏交碑。

(又)

在報德祠內。

案在敷文書院右。不知何時改爲紫竹林。

明萬曆間。

左江道楊公寅秋綏交有功。

建祠於

此。勒石有綏交記。文并遺像。兵燹後圯。

王文成公石像。（古今圖書集成）在敷文書院內。

（明巡撫巴縣楊芳閱王文成公石刻詩。）幾懷名世思翩。倚檻靈光頓巋然。洙泗有源從此浴。鼎鐘無處不

爭傳。神資上智天重啟。夢入前賢斗共懸。却愧支離回首際。良知千載是真詮。

蕭文端公遺像。（採訪）像為名手所寫真。本蕭氏藏。今改電版景本。

邕州廳壁石刻。（名勝志）宋永范旻字貴□丞相質之子。嶺南初平。旻□邕州為□邕管記三

卷。并刻療病方書。真諸廳壁。（謝通志）療病方書在宣化。待訪。

擷青巖石刻。（府志）在青山擷青巖。大書陽明先生過化之地八字。

浪濱石刻。在縣東八里。其刻曰振而不洩。又曰中流砥柱。字徑尺以上。

斑峯石刻。在縣南斑峯絕頂。刻曰晴雪梅花。清光緒間鍾太史德祥書斑峯二字刻其上。

宋蘇忠勇公成仁處。（採訪）舊城隍廟後。

俗稱後宮城

明禮部尚書贈太傅蕭文端公里宅。（蕭氏譜）故里在城西七里淡村。故宅在城南隅。康熙間

改為提督學院行館。並據考棚舊碑。

恩覃先世班統百僚坊。（採訪）在石牌坊街。為文端公蕭雲舉建。

父子進士坊。（又）在北門街為浙江衢嚴總兵潘御龍翰林院庶吉士潘德周建。

節孝坊。（又）有四。一在鐘鼓樓。旌馬之騶妻蕭氏。額曰貞篤。一在鹽埠街。旌何廷貴妻

錢氏。一在銀獅巷。旌□□□□□一在古城隅已圯。

按民國二十一年開關馬路俱毀

銅鼓。（府志）宣化城北山下。農人黎田。得銅鼓土中。形如坐墩。而空其下。滿腹皆蒼級

細花。極工緻。四角有小蟾蜍懸其旁耳。擊之聲極清越。置學宮中。又城隍廟後寢。有小鼓。形製相同。其文若鳥篆。而不能辨。今無存（採訪）縣東所見鼓三。高皆一尺五寸。面徑可三尺。重可一千二百八十兩。其周緣以細文。腰略胸。中當擊處。有圓光。髣髴如古錢。如五星。四緣則蟾蜍距之。其數各六。縣西一鼓。乾隆間出。底空腰束而面圓。平徑二尺。高二尺三寸。有黽屬四。作欲跳狀。上坐立馬將軍盔甲戈戟皆具。與縣東之鼓異。此所謂鑄為馬式者也。識者以為駱越故物。縣南一鼓未見。（白河知縣縣人劉元清銅鼓歌）君不

見邕城城北山下土。農人扶犁耕春雨。滂礮礮牛却驚。淺鬪深鋤露銅鼓。幾人曩置空庭。誰謂深藏不肯語。一朝物色博購歸。拂拭沙泥紋尙微。兒童戲擊吼如鼙。摩挲余得日依依。陶冶形模出鬼斧。週迴法式隨天機。南北西東位蟾蜍。左右四耳分輪廓。面平腰裊肱其脚。天然翡翠成斑駁。吁嗟乎宇內車書同一軌。神州赤縣端歌吹。越裳航海靜無波。匈奴不敢南下窺。銅鼓銅鼓胡為乎出哉。詎非鬱勃文章事幽闕。欲向玉京帝里售深意。由來奇器神欽羨。簪笏人家敢輕慢。貯之金屋起長虹。南宮月黑生雷電。

古錢古貝。（採訪）開元錢。光緒二十四年。四塘鄉人。於自在嶺得之。數達三十餘緡。無一雜錢。輪廓視通行之開元錢為大。（古貝）民國八年。縣東賢村人。濬池所得。有甕貯之。質堅甚。今度朝川小學。

興陵。（府志）在縣西合江鎮宋村。葬桂王妃。（小腆紀年）永歷五年。

案即順治八年

夏四月戊午。

太后王氏崩於田州。五月葬南寧。上尊謚曰孝正莊翼康聖皇太后。

（攷曰）行朝錄云。甯王大后馬氏。崩於田州誤也

。又曰。黃宗羲行朝錄。謂尊太妃王氏為孝正皇太后。亦誤也。參攷諸書。則馬太妃之冊尊為太后。在王太后薨於田州之後。即位時未冊尊也。

案興陵葬明孝正皇太后王氏非馬氏。小腆紀年。駁正行朝錄甚析。而土人稱為王姑墳亦誤。茲據明史諸王列傳。明史紀事補遺陳秉鑑所知錄。邵廷彩西南紀事。陳仲逸桂太妃遣使羅馬考諸書。為作孝正皇太后外紀。太后



王氏湖黃人。桂端王常瀛之繼妃。桂王由榔嫡母也。端王神宗開潘衡州。崇禎末。張獻忠大掠衡永。端王避居梧州。薨葬藤縣城北。號興陵。由榔嗣王。后爲桂太妃。隆武二年丙戌。北兵下福建。唐王殉社稷。兩廣總督丁魁楚。廣西巡撫瞿式耜。巡按王化澄。將奉王監國。后不許。召科臣李用楫程源等責之。因謂羣臣曰。諸先生何患乎無君。願更擇可者。且召王入宮誨之曰。吾兒仁柔。非撥亂才。何苦以一朝虛號。塗炭生靈。南中閩中可鑒也。楚魁等意益堅。乃以丁亥十月十四日。奉王監國肇慶。十八日。卽皇帝位。以明年爲永曆元年。追崇端王爲端皇帝。廟號興宗。上后尊號曰甯聖慈肅皇太后。封后弟國璽武靖伯。生母馬氏曰慈聖皇太后。冊妃王氏爲皇后。十二月北兵破廣州。靖江伯嚴雲從。乃扈二宮至桂林。永曆元年二月。王幸桂林。四月移武岡。叛鎮劉承胤。將導北兵犯行在。后詔召商丘伯侯性入衛。性以兵奉三宮。走古宜。出柳州。王復幸桂林。十一月。大學士王化澄。侍郎吳貞毓。以簡道扈三宮入南甯。二年三月。王亦繼至。是年粵贛皆反正。三宮東幸。以肇慶爲小朝廷。四月。北兵日逼。復移南甯。五年三月幸田州。四月十二日。后崩於田州。二十三日。梓宮至南甯。暫安城外天甯寺。上尊謚曰孝正莊翼康聖皇太后。七月十八日。葬於宣化縣西合江鎮之宋村山。亦號興陵。后賢明。通知大體。然頗持大主教。有教士瞿紗微。Andre Xani r Kofflers. 者。進回回曆。行朝嘗頒行之。瞿紗微既以天算結行朝。故三宮皆從受其教。變易名號。中宮皇后號亞納。皇太子慈烜號當定。馬太后號馬利。馬利。耶蘇母也。后號列。納 He Letre 列納者羅馬教皇當定之母。皆彼中奉教最虔者。因以爲名云。北兵再壓廣東。行朝議遣使羅馬乞師。仍以波蘭教士卜彌格 Michel Boy M 往。后亦自爲書遣教皇。因諾曾爵 Innocent 適教皇卒。嗣皇亞力山大七世。Alexandre VII 款接如禮。越二年。卜彌格歸自西洋。師不果出。而后已崩。王亦入滇。北兵取廣四。瞿紗微與卜彌格。並見執。不屈死。惟后所遺教皇書。今存羅馬。皮書樓中。

宋廣南西路經略安撫大使知桂州石鑑墓。（府志）在縣西那龍西石村。

（明陳瑾拜宋經略本路安撫使石公墓詩）訪罷遺踪日未

斜。獨騎羸馬到山家。前朝松覆先賢墓。隔隴樵吹近戍笳。鳥自呼名招過客。人頻回首數飛鴉。思公秘策平變事。幾度聞鷄試劍花。

宋開封尹滕甫衣冠墓。（採訪）在縣東潭埕村。

明御史鄧洪墓。（府志）在北教場西。有大學士彭時墓誌。

明兵部職方司郎中鄧洪震墓。（採訪）在縣南長塘。

明雲南府同知鄧繼科墓。（又）在縣南五象嶺。

明德慶州判官陳琚墓。（府志）在城東北歸仁舖。新建伯王守仁有祭文。

（明王守仁祭陳判官文）  
嘉靖七年月日。欽差總制

四省軍務新建伯兵部尚書兼都察院左都御史王。差南甯府推官馮衡。南甯衛指揮王佐。致祭于已故德慶州陳判官之墓。往年羅滂淥水諸賊。為地方患害。判官嘗與已故指揮李松。議設墟場。以制禦賊黨。安靖地方。殫心竭力。盡忠國事。人皆知之。然其時百姓雖稍賴以甯。而各賊之不<sub>心</sub>肆其兇虐者。疾恨日深。其後不幸判官與李松。竟為賊首趙木子等所害。以忠受禍。心事末由暴白。連年官府。亦欲為之討賊雪憤。然以地方多事之故。又恐鋒刃所加。玉石無分。濫及良善。是以因循未即進兵。今賊首趙木子等。已為該道官兵。用計擒獲。明正典刑。松與判官之忠勤。益以彰著已。特遣官以趙木子等各賊首級。祭告于李松之墓矣。今復遣南甯府衛官。祭告於判官之墓。死而有知。亦可以少泄連年忠憤不平之氣也夫。

明惠州知府李天倫墓。（採訪）在縣東伶俐鄉羅藍村。

明贈太傅賜祭葬禮部尚書諡文端蕭雲舉墓。（府志）在八尺江馭良村

（明南京禮部尚書常熟錢謙益  
蕭公神道碑）天啓五年。禮部

尚書掌詹事府宣化蕭公。引年乞休。詔進光祿大夫予一品誥命馳傳歸。七年二月。以疾卒於里第。年七十有四。天子念先朝舊學。遣祭賜葬。恩禮有加。公薨後。十有二年。為崇禎十一年。天子維新大政。臨軒御殿。更定館制。親簡閣員。海內喁喁。想望治平。而謙益方訟繫長安。遇公之任子鴻襄鴻靖。相與伏地而泣。踰年釋歸。乃獲論次公事狀。書其墓隧之碑。謹案神宗皇帝時。天<sub>下</sub>無事。天子富於春秋。與公卿大夫。率繇祖宗故事。慎重館閣之選。儲時人才。為異日用。而儒學文章端方雋偉之人出。公諱雲舉。字允升。姓蕭氏。其本出自宋蕭叔大心。封於蕭。遂以為氏。繇漢迄梁。代為侯王。唐季有諱殷者。為馬殿判官。避亂江西之泰和。再徙濂源。國初適戍廣西。為南甯之宣化人。曾祖諱蕃。祖諱滿。考諱棟。以公貴。累贈如其官。妣皆一品夫人。公生于其父高要令之官舍。高要公夢五色雲捧日。覺而公生。因以名焉。生七年。母朱夫人卒。擗踊叫號。人呼孝童。二十舉鄉試。萬曆十四年舉進士。選翰林院庶吉士。三年。授簡討。公少負才藻。風發泉涌。在史館深思下視。刊華落實。尚勤問學。魯人弗如。識者卜其有公望矣。自簡討陞左贊善。凡十年。自左贊善歷國子監司業右庶子。陸祭酒詹事。凡九年。在詹端四年。陞禮部右侍郎。教習庶吉士。又一年改吏部左侍郎。充經筵日講官三品滿六年。以繼母羊太夫人里居。乞省覲。伏殿門泣三日乃得請。天啟初。召用。陞禮部尚書。一載。遂致仕歸。公篤誠祥順。行安節和。為東朝講官。齋心被慮。敷陳善敗。光廟嘆嘉焉。事神廟。撰進講草。鑿燈整衣。肅如對御。不以人主靜攝少假易。神廟深知之。欲枋用而未果也。萬曆之有黨論也。甘陵汝南之議。不欲附君子故去。天啓之有奄禍也。黃門北寺之獄不認附

小人。故再去。回翔詞垣。棲遲衰晚。不以容悅持祿。不以擊排植黨。不以年至隳節。不以時危易行。不終大用也。斯以爲端方偉。始終一德之君子與。嗚呼。國家史館之制。所以儲才養相。計安軍國。可謂至矣。拔自草茅。置之禁近。體優則其氣舒。局冷則其志澹。枕籍經史。無簿書期會之役。則其神簡。優游年歲。無傳遽拜除之競。則其智恬。三百餘年。謀王體。斷國論。有若金陵之義。升祔新都之阻封爵。莫不援据編帙。取摛腹笥。固未嘗薄館閣爲乏材。噴翰墨爲無用也。謙益登□□吏禮則公與崇仁吳公。掌院則耀州王公。掌詹則晉江翁公。祭酒則定襄傅公。此五公者。金聲玉色。質其有文。出入殿廷。朝右改色。或或乎彬彬乎。盛世之詞臣也。詩有之。鳳凰鳴矣。于彼高岡。梧桐生矣。于彼朝陽。繇今思之。萬曆四十年間。豈非成周卷阿之盛際與。謙益論著公事。而及此者。庸以祖宗養士之仁。彰神宗久道之化。贊颺休明。昭示後世。亦公之遺也。夫。公前娶鄧氏。後娶何氏。皆贈一品夫人。有子八人。曰鴻圖、鴻業、鴻襄、鴻靖、鴻慶、鴻祐、鴻譽、鴻振。鴻業、萬曆內午舉人。鴻襄戶部山東清吏司郎中。鴻靖太僕寺廳主簿。所著有青羅集五十餘卷。別集若干卷。公主萬曆庚戌會試。爲謙益座主。殿試讀卷。又首拔焉。所以教誨期待甚厚。衰遲坎陷。老而無成。公之二子。不以不肖有口于師門也。以公碑諉焉。故不敢辭銘曰。於穆神宗。如日方中。王多吉士。翹翹誰誰。有美蕭公。奮跡粵西。道山蓬閣。來游來儀。焯彼民譽。蔚爲國寶。公于斯時。麒麟朱草。乃晉坊局。以教成均。如袞掌誥。如贊考文。明廷開憲。細旃納牖。公于斯時。玉鉉大斗。東觀再游。西京出祖。哀此宮。傷彼金虎。布袍歸里。飭巾待期。公于斯時。夏鼎商彝。丁年俊英。白首魁艾。杞梓明堂。柱昭代。孰培養是。神宗之仁。豐水有芑。詒厥子孫。蒼梧之墳。喬木千章。帝命顯庸。豐碑煌煌。有君有臣。是保是師。我銘不忘。神祖之思。

明柳慶分守道參政傅應期墓。（採訪）在縣南五十五里那馬鄉南感村。

（傅宏烈中憲天夫愧石傳公碑。）公諱應期。號愧石。

江西進賢縣進士。任宣化知縣。浚陞柳慶分守道。內陞太僕寺卿。未赴。卒於己丑。以乙未十二月。葬於宣化縣上南八都那棉嶺。廣西巡撫撫蠻滅寇大將軍男宏烈立。知南甯府事江陵金光聲書。按國朝先正事略。傅宏烈傳。父應期。明末官廣西卒。阻兵不得歸云云。是己丑爲永曆三年。卽順治六年也。

明監軍御史周稷墓。（採訪）在城南亭子鄉逢官嶺。

明黔陽知縣陳大經墓。（又）在縣東二十五里嘯天獅嶺。

明韶州知府陳大綸墓。（又）在縣東六十里莫村黃范驛。

明懷遠將軍羅□墓。（又）在縣東八十里賴村。

明金吾念齋吳□墓。(又)在縣東八十里晚感村。

明文淵閣大學士謚忠節嚴起恆墓。(永曆實錄)嚴起恆葬南寧江岸。(小腆紀年)永曆五年二

月。孫可望遣其將賀九儀。殺明大學士嚴起恆於南寧舟中。屍流三十里。泊洲渚間。突有虎負之登岸。守視不去。九儀驚悸累日。乃禮而葬之山麓。至今人稱虎墳云。(府志)

在縣南青山。後其子改葬平樂縣之津平里楊梅村。(明行人衡陽王夫之哀少傅嚴公起恆詩)(原註)公字秋冷。山陰人。辛卯以抗孫可望被害南甯。天

風號萬木。不動獨搖草。霾雲蔽平野。上有白日杲。剪燭倚黃閣。良夕披懷抱。萬里依嶺雲。傾心付肝腦。妬詿相嫌猜。亡命就猺獠。回家蒼梧煙。雪涕長不燥。所悲違九閩。未忍矜四皓。魑魅不可羣。非公言不早。終迷具茨駕。永恨田橫島。北海未先亡。炎精未枯槁。劇哉莽蠱螫。誰辨食髓媚。公生固不謀。公死卽善道。隨地洒碧血。黃屋依羽葆。長笑睨吳霖。持茲謝金堡。南海珠還池。湘江清滌藻。太守貧而樂。方伯慈爲寶。碩德及丹心。千秋足揚擢。微生附宮牆。下交遺紵縞。長夜一永訣。餘命遂衰老。猛虎負貞骨。幽眷知天保。精爽何所憑。吾其玄昊。

清衢嚴鎮總兵潘御龍墓。(採訪)在城北直村。

清韓林院庶吉士潘德周墓。(又)在城東周家山。

清福建永福縣知縣馮世俊墓。(又)在橫州白象嶺。

清舉人馮紹業墓。(又)在縣南剪刀塘四郭嶺。

清太僕寺少卿馮贊勳墓。(又)在縣南蒲津鄉獅子嶺。

清舉人馮建勳墓。(又)在良慶玉洞村邊。

清宣化縣知縣蘇在中墓。(又)在遷隆鄉朗墟南二里。有碑。

清柳慶鎮總兵黃忠立墓。(又)西壕畔。

清進士謝煌墓。(又)在縣南平樂村。

清貞女馮三姑墓。〔又〕在縣北子嶺。

京觀銘。〔府志〕在縣東歸仁舖側。宋狄青大敗儂智高於歸仁舖。遣彬縣尉歐有鄰。斂賊骨

三千三百有八瘞之。築其地為京觀。命余靖。案府志誤以銘為狄青作。今據武溪集采入。而正其名為余靖。為記銘。立石以

志。〔謝通志〕宣化京觀銘待訪。〔余靖大宋平蠻京觀碑記〕大宋皇佑四年夏五月。廣源州蠻。犯邕州陷之

傅城。攻之五旬。雲梯土山。極肆其巧。城堅不能下。乃還。經途。復殘二郡。覆四將。再入於邕。凡害將佐三十

餘員。虜生口萬計。牛畜資實無算。所過焚蕩無餘。楚越蕭然矣。朝廷憂之。君臣為之旰食。樞密副使狄青。抗

章請行。願授成算。上重其誠。從之。先是命樞密直學士孫沔。入內押班石全彬。同本路經畧使余靖。經制賊盜。

命青以宣徽使都大提舉。總其節制。明年正月己未。青帥三將兵。至邕州歸仁舖。賊舉眾出城拒戰。大敗之。騎兵

追奔十五里。所殺蠻眾二千二百餘人。偽署侍郎黃師宓等。腹心將領五十七人。死於陣。賊首儂智高。其夜焚城自

遁。詰朝。引兵入城。俾供奉官賈榮。就戰場。斂賊屍而殮之。為塚於歸仁之南。又遣彬縣尉區有鄰。聚傷還城而

死。並活擒而戮。及奔而蹂踐燔灼者。三千二百二十八人。為一塚。瘞之於城之北。三月。有詔即其地築為京觀。

乃命立石以志其伐。銘曰。庸臣司邊。率職不虔。盜起其間。蠢爾異類。藏亡納叛。以輔狡頑。窺茲無備。乘虛襲

怠。遂肆兇姦。順流而東。列城皆空。嶺表騷然。師徒桓桓。失勁摧完。天下惻然。帝命樞臣。握節屬韉。拯墜綏

殘。師行以律。賞罰貴必。其謀乃專。兵家之勢。動靜有制。所擊無堅。吁嗟羣醜。狃於常勝。敢當其前。驅彼犬

羊。敵此熊羆。血膏於原。棄甲於山。遺骸巨野。百里腥膻。武功外揚。人心內憫。念彼幽泉。肩髀之葬。京觀之封。銅柱齊年。天聲遠振。皇澤重宣。永鎮羣蠻。

萬人塚〔府志〕在城西西平橋畔。明永曆間寇亂。白骨盈野。巴東王儼鈺。斂而瘞之。有碑。

義塚。在縣南團黃村側。同治間。楚軍征剿孫寇陣亡將士遺骸。邑人黃瑞麟收而葬之。

邕甯縣志卷四十三終